

1 PIIHTER

Wargahng Umodho Naa Agweed Piihtere Rob Ke Nying Warga

Wargahng Umodho gihr Piihter anaa agweede ke yihr jo yiiho e cuohn ne “Yaa Juog naa akwanye.” Ge anahg nyoge maa anaa akeedho ke bang yi piny Aacya Gihn Thiin. Warga gihn ni agweed kaa nying ciim cwihny yaa kwaan ngo, bang gihn bahng anaa akedh rog gen keter ke nying gihn ayiih gene lum Juog. Cwihny yaa nu aciim Piihtere kaa dhe yoohn ber Ciig Beer ke nying Jeacuu Kriihjto ngaan gaahn gene. Ke nying thone maa cahre kedea ciig gihre kejea e uduu. Noono, e ge dhiil yiiho uguum gene giih bahng. Kedea unghy gene ngo kejea yiiho gihr gen e ne yea med, abea keehd maano e akweehn me beer uyoad gene “Cahng uduu Jeacue naa akwany Juoge.”

Piihter nying yaa kwaan warga gihn ni, akwaye beere ge ubeehdo ke dhe yoohn daahd Juoge.

Kaa Acaan Luube

Lum umodho 1:1-2

Gaahno maa adiehr 1:3-12

Beehdo e adhemuohm tooro rog 1:13-2:10

Gihn tiihy jo yiihe nea giih ajohr pahdh wudh
gen 2:11-4:19

Kar kaahn jo yiiho 5:1-11

Gug luube 5:12-14

¹ Yihr yaa akeedho ke yihdh miehy Poantuj kedea Galaadya, maa Kapadoacya kedea Aacya kedea Bihdhihnya. A Piihter ngaan aohr Jeacuu Kriihjte, a ne gweehdo yihru.

² Wu ge beehda aleye wiih piny kan ge angahy Juog Wuur kedea umiege wun kuu umodho kedea Wahy Juog en ne yug wun ne nyoge me beey bang utiihyu ke lum Jeacuu Kriihjto kedea bang ne yor wun ke reme. Beehn Juoge cube deeh muuny kedea doohr me ne cohg yihru.

Gaahno Maa Adiehr

³ Nying Juog ge Wur Ruohdho Jeacuu Kriihjto, ke wuoro bang gihn wo angwaahne keraahyo udooongo ne nyoge maa anyuol nyaahn. Wahy me nyaahn acube yihro, me weehg wo gaahno ke dhe yoohn cahro gihr Jeacuu Kriihjto naa acahre uyedhe maalo yi dahg nihn batien naa athowe.

⁴ Kaano arumo e yihru unaa giuh me beeye maa aguog Paar Maalo muu ulagu. Giuh me ge be kwaahl kedea ge be tob maa ge be rahny.

⁵ Giuh nu beey ge giuhu wu yaa koar Juoge keehd tee gihre ke nying yiiho gihru beere wahy me be gug naa agwiire ke nyingu paare yoadu yoado cahng gug piny.

⁶ Kea noono mihn cwihnyu ne cohg bang gihn giuh me beeye ge nud wong maalo ke nyingu. Abea keehd maano e wu ukuong toohng yihdh giuh me reje umodho.

⁷ Wu utoohng yihdh giuh reje umodho beere kaa ayiihu kii ngo ke tumo nea yea teeg wale giuh nyooro ge ne yea. Ke tumo wa gihr ngiihnyo maa aleehdho upiire. Abea yiiho gihru wiihe ne maalo rih ngiihnyo bang gihn ngiihnyo beehda gihn muu uthumo. Nea yiiho gihru atum uyoade e ngo teeg, e leej kedea puoyo me duohng uyoadu cahng uduu Jeacuu Kriihjte.

⁸ Ngo anhyaaru keehd me bahnge kihde kuu aniidu. Abea keehd me bahnge ngo be niidu awaahn ni, e lume ayiihu kedea yihru ne med cwihny me duohng muu uneehno ne dahr.

⁹ Cwihnyu med bang gihn akoohg gihn ucub yihru ke nying gihn gaahnu ngo beehda boadh wahy ge uyoadu.

¹⁰ Anahg boadh wahy e naa apiih agamloohngjuoge ne dead yea kedea ucaar gene muuny gihn ubeehn Juoge ne cubo yihru.

¹¹ Yaa gamloohngjuog ge ake peehyo ke nying giuh raahm rog kedea giuh moar wihj ge utiihy rog gen rih Ngad Boadh nyoge. Giuh nu anahg Wahy Juog ge aohr Jeacuu Kriihjte, e naa anaa arob gen yi aduun yaa agamloohngjuog. Ge ake peehyo thiow kejea weehne e nuu utiihy giuh nu rog gen kedea rog gen utiihy gene ke rih ngaa.

¹² Ngo anaa arob yihr gen kejea padh ke nying mar ngud gen abea anahg ke nyingu. Run ngo ge giuh nahgu yihdh gen. Awaahn ni Ciig Beer ge arob yihro cang. Ciig Beer ge apuohny yihro kaa teeg Wahy Juog naa aohr ke yoohn Paar Maalo.

1:7 1:7 1Kor 3:13 **1:8 1:8** Jon 20:29; 2Kor 5:7 **1:9 1:9** Rom 5:2; 6:22; Epi 1:14 **1:10 1:10-11** Luk 24:46; 1Kor 15:3-4; 2Pii 1:19-21 **1:12 1:12** Epi 3:9-10

Keehd wuohdjuog e cwihny gen ne bang ngey yihdh Ciig Beer.

Beehdo E Adhemuohm Toor Rog

¹³ Kea noono thubu kaa awaahn kan ke gwiir rogu ne tiihy gihn ubeehn kedea koaru rogu beer mee kedea piihu ne gaahn muuny gihn ucub nea Jeacuu Kriihjto uduuo.

¹⁴ Lihngu lum Juog bang gihn wo beehda nyethen Juog kedea wiiu dhog yiehdh acoon ge na beehdu kii ngo e gihn maa angahyu atooro.

¹⁵ Kwaad giih tiihyu nahg gene giih me yihdh gen tooro giih adhemuohm wa ka nahg Juog ngaa me ree tooro adhemuohm.

¹⁶ Agweed yi kitaab Juog naa,
 “Beehdi e rihi tooro adhemuohm
 bang gihn riha tooro adhemuohm.”

¹⁷ Me neehn kaano kwahyu yihr Wuru ge ne Maalo kedea ngo ngahyu kejea be luuo ke tiel, kea noono beehdu e wu lwaahr keehde wa ka nahgu aleye wiih piny kan.

¹⁸ Juog gihn maa acube piny nud ne kahl wun oogo yi yoohn rwaahny wun ge adaahd ge wuru wun ke kahlo kii ngo. Gihn acub Juoge piny padh gihn me thum wa mar dhaahb wale damaro me neehn kaano ngahyu ngo.

¹⁹ Juog beehda Ngad Boadh nyoge e naa akaabe ne gihr remo ne nahg piny ke nyingu. Gihr remo me ngiene teeg kedea adhemuohm tooro ree.

1:14 1:14 Rom 12:2; Epi 2:3; 4:17-18 **1:17 1:17** Mat 6:9; 16:27; Rom 2:6; Jeam 2:1; 1Pii 4:5 **1:18 1:18** Mat 20:28; 1Kor 7:23; 6:20 **1:19 1:19** 1:1-2; Jon 1:29; Tihiy 20:28; 1Kor 5:7; Epi 1:7; Judea 9:12

20 Ngo akwany Juoge ne gihr remo me ngiene teeg ke coon e wiih piny poohd kuu acag, unahge kaa awaahn yi gug nihn e naa abeehn Juoge ukahle gihr remo oogo ne naah ne dooj wun.

21 * Juog ngaa atihng Jeacuu maalo yi thoo ucube ruohdh yihr ngo ayiihu kaa bang Jeacuu, noono e yiiho gihru kedea gaahno gihru naa yi cing Juog.

22 Awaahn ni Juog adhemuohme giihu ge aluoge oogo bang naa ayiihu lume ge adiehr. Ke nying gihn ni e kare nud unud nhyaahre yi cwihnyu ke nying kwaad dhaano utaahngo, adoohng e yaa akuud yiiho ge neehn wun. Kea noono nahgu nyoge me nhyaar rogu ke cwihny cang.

23 Wu anyuol nyaahn. Wu kuu atuohl ke rih kohnh dhaano ge rahny, abea wu atuohl ke rih kohnh Ngad Boadh nyoge ge be rahny. Kohnh Ngad Boadh nyoge yoad kaa dhe yoohn lum Juog ge kahl kuowo me guge tooro kedea lum ngo be yiid.

24 Bang gihn kohnh dhaano ngo neehn lum ge tal kedea tee dhaano utaahngo neehn thiiw ge lwaar oogo.

25 Abea lum Juog ree be waare. Lum nu e naa Ciig Beer gihn anaa apuohny yihru.

2

1 Noono wiiu yug giikh me reje kedea wiiu giikh

1:20 1:20 Epi 1:4 * 1:21 1:21 Ruohdh: 5:1; Rom 5:2 1:22
 1:22 2:17; 3:8; 4:8; Rom 12:9; Gal 6:10; 2Pii 1:7; 1Jon 4:11 1:23
 1:23 Jon 1:13; Judea 4:12; Jeam 1:18 1:24 1:24-25 Jeam 1:10-11
 2:1 2:1 Epi 4:25; Jeam 1:21; 4:11

toohd maa giih waane. Wiiu nyahg kedea wiiu waaj nyoge.

²⁻³ Awaahn ni ngo aniidu e ka beer Jeacuae ke wun. Nea wa maano keá wiiu tiihy giih adhemuohm kedea wiiu giih acamo. Nea wa maano kea nahge ke giih Paar Juog ge ne cubu yi cwihnyu wa mar nyethiin ge cub cwihnye rih caag men. Tiihyu giih nu bang udoongu yi lum Juog.

⁴ Awaahn ni beehnu bang ngaa neehn meehn wod gihn anaa akweer yaa geere keehde maa abeehn Juoge ngo ne kwanyo bang gihn e naa anhyaar Juoge.

⁵ Wu thiow, wu neehn meehn wod gihn ugeer Wahy Juoge wod Juog keehd gen. Wu akwanye beere wu udoohng ne yaa lam me Wahy Juog e naa akwany wun yih Juog. Noono e giih lamu ge nhyaar Juoge nhyaaro ke nying Jeacuu Kriihjto.

⁶ Ngo agweed yi kitaab Juog naa,
 “Beeh niidu kaa akwanya meehn wod maa
 anhyaara
 me maga wiih wod keehde.

Wod gihn ageera yi geen Jaayon.*
 Ngaa yiih luma

cwihnye buu udaag yi gihn utiihya yihre.”

⁷ Yihru wu yaa ayiiho, ngaan akwanya ngo anhyaaru abea yih yaa kuu ayiiho,
 “E naa kaaw gihn akweer yaa geere keehde e
 adoohng ne meehn gihn amag

2:2-3 2:2 1Kor 3:2 **2:5 2:5** 2:9; Rom 12:1; Epi 2:21-22 **2:6**
2:6 Rom 9:33 * **2:6 2:6** Beehda Jeruucalem e gihn nu cuohn ne
 Jaayon, Yicaaya 40:6-8 **2:7 2:7** Mat 21:42; Tiihy 4:11

wiih wod keehde.”
 8 Thiow agweed yi kitaab Juog naa,
 “Ngaan akwany Juoge
 e nuu unahg leen cwahny nyoge keehde
 ge umeehg gen pahdho.”

Yaan nu ge nyoge maa acwahnyo bang gihn lum
 Juog kuu ayiih gene kedea e naa gihn agweehg
 Juoge ke nying gen.

9 Abea maru wu beehda nyoge me Juog e naa
 akwany wun. Wu beehda yaa lam me tiihyo
 yih Ruohdh. Wu nyoge maa acub rogu yih
 Juog, wu beehda joe. Noono, e kare nud yihru
 unyoadhu kaa akahl Juoge wun oogo yi muudho
 kedea ukedhe wun yi daahr gihre me cang ne
 wij wij kedea wu ukwany ne rob giuh beeye ge
 atiihye.

10 Umodho coon wu kuu anahg yaa Juog abea
 awaahn ni wu beehda joe. Coon Juog cwihnye
 kuu anaa aduue caahn ke nyingu abea awaahn
 ni ngo ayoadu kejea cwihnye aduue caahn ke
 nyingu.

11 Wu goma me nyaara nyaaro keraahyo,
 wu neehn aleye me beed wiih waahdh me piny
 me beedu tooro. Naa anahgu nyoge me wa
 gihn nu kea cwihnyu keá yuohd rog giuh nyaar
 dhaano utaahnge ge yih gen ne mahn keehd
 wahy dhaano.

12 Beehdu beer mee kiin yaa kuu ayiiho keehd
 maano koohb gene kejea wu tiihy giuh me reje,

2:8 2:8 Rom 9:33 **2:9 2:9** 1:2; Tiihy 26:18; Rom 5:17; 2Kor 4:6;
 Epi 5:8; Tii 2:14; Judea 13:12; 1Pii 2:5; Any 1:6; 20:4 **2:10 2:10**
 Rom 9:25 **2:11 2:11** 1:1, 17; Rom 7:15, 17-23; Gal 5:17; Judea
 13:14 **2:12 2:12** Mat 5:16; 2Kor 5:10

bang gihn cahng ungey gene gihn beer ge atiihyu, e Juog uleej gene cahng beehn Jeacuue ne lieu won.

Wuoru Ruohdh Paajo

¹³ Wuoru ruohdhe giij wiij piny kan ke nying Jeacuu Ruohdho, wuoru ruohdh duohng yi paajo.

¹⁴ Thiow wuoru kwaad yaa acub ruohdh duohnge piny nyum nyoge ne kihm yaa ayug giij me reje, maa ne muohj koohdh yaa yug giij beey.

¹⁵ Beehda Juog e ne daahd wun utiihyu gihn me beer beere yaa kwihj luube ge be rubo rogu.

¹⁶ Beehdu ke beehd nyoge me padh baahng, abea kwaad beehd nu keá logu ne dhe yooh me koolu giij reje ge yugu. Wu dhiil nahg baahng giij Juog.

¹⁷ Nyoge keá dhahlu kedea nhyaaru wadu ge ayiiho, wuoru Juog kedea wuoru ruohdh gihn amag paajo.

¹⁸ Wu baahng wuoru yaa tiihyu yihr gen kedea tiihyu gihn teed gene yihru. Wu keá lihng luub yaa beey cog, lihngu luub yaa reje thiow.

¹⁹ Ngo beehda gihn me beer uyoaad gihn me raaj ke nying gihn me beer maa atiihj bang gihn ngahyu gihn daahd Juoge.

²⁰ Gihn me beer me yoadu tooro ne guum apoothdo gihr gihn me raaj e ayug dhaane. Abea Juog wu udooje ne guum giij raahm me gihn me raaj maa ayugu tooro.

2:13 2:13-14 Rom 13:1-7; Tii 3:1 **2:15 2:15** 3:16 **2:16 2:16**
 1Kor 6:11, 19-20; Gal 5:13 **2:17 2:17** 1:22; 3:16; Mat 22:21; Gal
 6:10; Pihp 2:12 **2:18 2:18-3:7** Epi 5:21-6:9 **2:18 2:18** Epi 6:5-8
2:19 2:19-20 5:12 **2:20 2:20** 4:14

²¹ Wu acuohn kaa nying gihn ni: Ngad Boadh nyoge ke ngude abang uguume giih me reje ke nyingu kedea wu naa awiie piny ne yaa ukwany yihdh buy tiene.

²² Adhemuohm maa atiihy Jeacuue atooro kedea toohd maa arobe atooro.

²³ Naa abeehn nyoge uyeny gene ngo e dheer kuu ne kweg uluunye kedea naa ayoade giih raahm kuohm e ngaa maa acehme tooro. Ree acube yih Juog ngaa be luuo ke lug tiel.

²⁴ E ke ngude adhemuohme giihu ge atihnge ke en e ngo ne rih yaadh maa ariihw, beere giih adhemuohm be cahgo ke tiihyo unahge giih beeye ge ne tiihyo. Kuohn ka me ledhe giiehe ge naa athiehdh won.

²⁵ Bang gihn wu ake roomo wa roohme maa arwaahnyo, abea awaahn ni wu aduu bang ngad kwaah ge koar wun.

3

Maahn Kedea Cuow Gen

¹⁻² Wu maahn, tiihyu kwaad gihn arob cuowu yihru. Tiihyu gihn daahd gene keehd me kweer gene ke lihng lum Juog e lum Juog udhiil gene ke yiiho ke nying gihn beehdu beer ke gen. Dhe yohn beehdo beer gihru ke gen akaal wiih luub na robu yih gen ke nying Juog.

2:21 2:21 Mat 16:24; 20:26-28; Jon 13:15; Rom 15:5 **2:22 2:22**
 Jon 8:46; Judea 4:15 **2:23 2:23** 3:9; Mat 26:55-56, 67; 27:14, 27-31
2:24 2:24 Rom 6:2, 11; Klo 2:14; Judea 9:28 **2:25 2:25** Mat 9:36;
 Jon 10:16; Judea 13:20 **3:1-2 3:1** 1Kor 7:16; Epi 5:22-24

³ Wudhu keá paru kejea kahd wihj ke wuohbo kedea ruug rog ke tiyy wale ngaab waare me ne jieng jieng ge ne yug wun ne jur.

⁴ Jur me ne cohg naa yi nud cwihny kedea e naa juro me be thum maa e ne nhyaar Juoge bang gihn ngo beehdo e beer.

⁵ Bang gihn maahn acoon, ge anhyaar Juog, cuow gen na wuor gene wuoro e naa gihn anahg gene jure.

⁶ Wa mar Caara naa awuor Abraahm cuore ucuohne ngo cuohno ne wur paare. Nea gihn me ne cohg atiihyu kedea utoor gihn me tudu yihre e wu unahg kwaay Caara.

⁷ E wu cuow thiow yi beehdu gihru ke maahn ngahyu ngo kejea tee gen be room ke tee maru. E naa gihn dhiilu gen ke wuoro thiow bang gihn Juog muuny gihre ge yoad kuowo me be gug buu ucube ke yihru cog, ngo ucube yihr maahn thiow. Beehdu ke maahnu wa gihn nu beere gihn me gahl kwaj gihru yihr Juog tooro.

Raahm Rog Yoad Yi Tiihy Gihn Me Beer

⁸ Lum ni beehda ke nyingu cang: beehdu ke beehd yaa paajo acielo. Beehdo me wudhu be tihngu maalo. Beehdo me yej amad kedea nhyaaru rogu ke dhog yiehdhe beehde.

⁹ Wiih gihn me raaj keá coalu ke gihn me raaj kedea wiih ayaany keá duogu kaa ayaany. Abea nea kaa ngo ne cohg kwayu Juog ukonye yaa nu bang gihn wu akwany Juoge ne tiihy giih nu, beere Juog wu dooje dooje.

10 Wa kaa agweede yi kitaab Juog naa,
 “Kwaad ngaa daahd ngo uyoade wahy,
 maa uniide giuh me beeye kea koare leebe,
 kedea dhee keá meehge rob toohd.

11 Wiie tiihy giuh me raaj uloge wiie ne tiihy
 giuh me beer.

E thiow doohre nyoge doohro.

12 Juog wonge be loge oogo rih ngaa abiohgrwaal,
 kedea kwaj gihr ngaa maa abiohgrwaal lih-
 nge lihngo ne cohg.

Abea yaa tiihy giuh reje,

Juog wonge beehde aloge oogo rog gen.”

13 Ngaa e ne kedh ngwiil rihi nea yih nhyaar
 yug giuh me beer?

14 E thiow keehd me yoadu ngwiilo ke nying
 tiihy giuh me beer, e ngo beehda dooj. Wu keá
 tud yihr gen wale keehd koohdhu keá paahr.

15 Abea nahge ke gaahn Ngad Boadh nyoge
 e ne cubu yi aduunu kedea nahge en e naa
 Ruohdhu. Nea wu ke peehnyo ke nying giuh
 gaahnu Ngad Boadh nyoge ke nyinge kea beehdu
 e ka beehru ngo kii ngo ngahyu.

16 Kedea beehru wiuh lum gen ke lubo me beer
 kedea ke wuohdo. Duogu wiuh lum nu e giuh
 me dieru ke nyinge tooro kedea ke dhe yooh me
 beere wudh yaa rob giuh me reje rogu, wu ge yaa
 batien Ngad Boadh nyoge, wudh gen ulaahyo ne
 ngahyu rob.

17 Ngo ngweehn uyoah dhaane bahng ke nying
 tiihy giuh me beer, nea giuh ngo beehda kar

cwihny Juog, yihr man yoad bahng yi tiihy gihn me raaj.

18 Ngad Boadh nyoge ke ngude athow ne cielo ke nying adhemuohme giih nyoge cang, Ngad Boadh nyoge ge beehda abiohgrwaal athow ke nying yaa reje. Ngo athow beere wo kedhe ke Paar Juog. Anahg kuohme en naa athow abea wahye ge akuowo.

19 Noono maa a'aaye uwiie kuohme piny ne ci ne puohny Ciig Beer yihr atiihbe giih anaa acoon ge amag ne maabuuye.

20 Atiihbe giih yaa acoon yi run Nooh ge anaa akweer ke lum Juog. Yaa anaa abuhj Juoge ke koar gen e cwihnye kuu angol rog gen kaano anaa geer Noohe yaahy geero. Noono unahge ke nyoge abiihjbedahg cog ge naa abodh e ge kuu amud.

21 * Piih nu amud nyoge anyoadh dhe yoohn nud awaahn ni ge yoad piih luogwahy uwoj gen yi wiih dhaano ne cub luogwahy. Luogwahy e ne cub boadh wahy yihr dhaano. Piih woj wihj ge be luog nyooro oogo rog, abea ge nyoadh ngo kejea dhaano ree akuohnge nyum Juog ne beehdo ke dhe yooh me beer. Kedea piih nu wahy dhaano boadh gene boadh ke dhe yoohn abeehn Jeacuu Kriihjte ucahre.

22 Jeacuu Kriihjto e naa ngaa acidh Maalo kedea upiie ukwiihy Juog yi ruohdh. Kedea uyug Juoge ngo ne ngad duohng yihr wuohdjuog

3:18 3:18 2:21; Rom 5:6-8; 6:10; Judea 4:15; 7:27 **3:19 3:19-20**

2Pii 2:4; Juud 6 * **3:21 3:21** Rom 6:3-4; Judea 10:22Ukwiihj: Mat 22:44; Rom 8:34; Tiihy 2:33 **3:22 3:22** Tiihy 1:9; Epi 1:21

maa yihr ruohdhe giuh atiihbe.

4

Cub Rog Yihr Juog

¹ Wa kaa ayoad Jeacuue raahm rog, e wu thiw gwiiro rogu uparu giuh raahm rog wa mar Ngad Boadh nyoge. Bang gihn ngahyu ngo kejea raahm kuohm e ne kahl dhaano oogo yi cing adhemuohm.

² Kedea wu buu unahg nyoge me koag ke log cwihnyu rog giuh adhemuohm uwahdhe cahng thoo. Wu unahg nyoge me koag ke log cwihnyu yi tiihy gihn daahd Juoge.

³ Yihdh run abar wu abuohj ke tiihy giuh reje ge nhyaar yaa kuu ayiih lum Juoge. Giuh reje me neehn bal kedea maadh kuong, maa tiihy giuh cwaahne maa maang pey yiehdhe me neehn aroap, maalo, macaahrdiidh, bang gihn ge be nhyaar Juoge.

⁴ Naa angolu tiihy giuh nu ne ngwedh e nyoge ge agaahy. Noono e ge apiih ne rob giuh me reje ke nyingu.

⁵ Giuh nu rob gene rogu ge keá cubu yi cwihnyu bang gihn giuh gen noono tiihy gene, yihdh gen ubeehn gene ne kwanyo yihr ngaan agwiir ree ne beehn ne ngol lubo yihr yaa kuow maa yaa athow.

⁶ Ke nying gihn nu e naa apuohny Ciig Beer yihr yaa athow, beere keehd maa akihm koohm

gen wa ka kihm dhaano ukar upiny kan, e wahy gen dhiil rom kuow wa mar Juog.

⁷ Wun, paru wudhu uyabu nyingu maa koaru rogu ne kwaj ne cohg bang gihn gug nyepiny cang acahngo.

⁸ Gihn wiihe ne maalo beehda nhyaar rog bang gihn nhyaaro adhemuohme wuunye ke oogo. Nhyaaru rogu naa aciel acielo ke keewu cang.

⁹ Loru weehle yihdh miehyu ke mihn cwihny.

¹⁰ Juog wu amuoje kaa amahr muuny me be room me romu tiihy nyepinye. Ngaa keá piih wiih muuny acub yihre. Dhiilu muunye ke nywaag e cwihny be daag keehd nyoge beere ge dooj Juoge doojo thiow.

¹¹ Ngaa puohnyo e giih robe nahg gene luub Juog kedea ngaa tiihyo dhiile tiihy ke tee acub Juoge yihre. Noono gihn nu e Juog ke leeyo yi kwaad nyepinye cang, ke nying Jeacuu Kriihjto ge e ne wuor kedea e ne yihre ne tee me guge tooro. E noono.

Giih Ajohr Ge Yoad Ngaa Maa Ayiiho

¹² Goma maa anhyaara keraahyo, cwihnyu keá daag kejea gihn me maahn en naa atiihy ree yihru nea giih ajohr ge pahdh wudhu.

¹³ Mihn cwihnyu bang gihn ayoadu giih ajohr wa mar Ngad Boadh nyoge. Kaano arumo e cwihnyu umed keraahyo cahng uduue e kaa amoar Juoge wiihe anyoadhe.

4:7 4:7 1Kor 10:11; 1Th 5:5-8; 1Jon 2:18 **4:8 4:8** 1:22; Jeam 5:20 **4:9 4:9** Judea 13:2 **4:10 4:10** Rom 12:6-8 **4:11 4:11** Rom 12:7; 1Kor 10:31; 12:8; Jeam 3:1 **4:12 4:12** 1:7 **4:13 4:13** 5:1; 2Kor 4:10; Rom 5:2

14 Nea wu acay ke nying Ngad Boadh nyoge, e gihn beehda dooj bang gihn ngo nyoadh ngo kejea Wahy Juog, e yihre ne tee, ngo ne rogu.

15 Nea wu ke joothro e ajohr keá beehno kaa nying nahg dhaano, wale ke nying kahw, wale tiihy gihn me raaj wale paahr yi gihn me nying dhaano tooro yea.

16 Ngaa yoad giih ajohr ke nying gihn ayiihe Jeacuu, e wiihe keá laahy, abea muohje koohr Juog ke nying gihn amade ngo kiin yaae.

17 Nihn ngol lug piny ge acahngo kedea lug thub ke wudh yaa ayiih lum Juog. Nea wo ge ayiiho e ne thub luge wudho, nea unahg mar yaa kuu ayiiho, e gihn upahdh wudh gen unahg gihn me teeg.

18 Wa kaa agweede yi kitaab Juog naa,
 “Nea ngo teeg yihr yaa abiohgrwaal uyoad gene boadh wahy,
 e mar yaa kuu ayiiho kedea yaa adhemuohm unaa ngihde?”

19 Nea wa gihn nu kea beehn yaa ayoaad giih ajohr wa ka daahd Juoge cub gene rog gen yihr Juog, Juog ge be waar lume kedea bar gene maalo ke tiihy giih beeye.

5

Yihr Yaa Doonge Kedea Yaa Rihj

1 A ge beehda ukiihj wa wun kedea a ge aniid kaa ajoohr Jeacuu Kriihjto kii ngo kedea ngo

ngahya kejea boadh wahy uyoada, nyingu kwaya kwayo wu ukiihye,

² unghayu nyethen Juog ke kwaago beer mee. Kaahnu gen beer mee padh ke nying dhaano maa ater wun yi tiihy nu, abea bang gihn beehda tiij, me wu naa apar ngo wu keedu wa ka daahd Juoge. Kedeo padh tiij maa adeehju yi cwihnyu ke nying koog.

³ Ge keá kaahnu ke cing nyooro, kaahnu gen beer bang ungoor gene kaa atiihyu kii ngo.

⁴ Kaahnu gen beer mee beere muuny me guge tooro yoadu yoado bang Jeacuu ngad kwaag wun.

⁵ Wa gihn nu thiow, wu yaa rihj lihngu lum yaa doonge kedea konyu rogu konyo ke dhe yooh me dhaano ree be leeye. Keá ngaa beel wa kaa agweede yi kitaab Juog naa, “Juog be daahd ngad nhyaam

kedea muuny gihre cube ke yihr ngaa me padh ngad beel.”

⁶ Nahgu nyoge me padh yaa beel nyum Juog ge yihre ne tee me duohng beere cahng pare ngo e wudhu tihnge ke maalo.

⁷ Wiiu giih dieru ke nying gen yi cinge bang gihn e naa ngaa kwaag wun.

⁸ Ngahyu rogu ke kaahno bang gihn atiihb ukeehg ngad mahnu ngo uwihno ne daahd ngaa me dwaahnge wa gihr nguu maa awaahdh ge cej ngaa me came.

5:2 5:2 Jon 21:15-17; Tiihy 20:28; 1Tim 6:5 5:3 5:3 2Kor 1:24; Pihp 3:17; Tii 2:7 5:4 5:4 1Kor 9:24-25; 1Pii 1:4 5:5 5:5 Epi 5:21; Jeam 4:6 5:6 5:6 Jeam 4:10 5:7 5:7 Mat 6:25-30; Pihp 4:6 5:8 5:8 1Th 5:5-8

9 Rogu keá meehgu dwaahngo yihre kedea magu yi yiiho gihru teeg mee kedea ngahyu ngo kejea kwaad giih ajohr ge ayoad wun ge ke tiihyo rog yaa ayiiho ke bang upiny cang.

10 Juog ngaa cub muuny, ge acuohn wun yi dhaahre ne beehdo tiehd ke Jeacuu Kriihjto, ubeehn ke ngude ucube thaahdhu piny beer mee uyuge wun teeg ubahnge yiiho gihru yea be lwagu batien kaa abuohju yihdh giih ajohr.

11 Kedea e ne yihre ne tee me guge tooro. E noono.

12 * Beehda warga me thiin mee e gihn agweeda yihru kedea ngo acuba yi Cihla. Cihla, nea ke kur mara, e ngo umiiho maa ayiih lum Juog ne cohg. Ngo gaahna gaahno kejea wargahng ni cwihnyu umeehge teehngo bang gihn, dhe yooH maa adiehr, ge beehn Juoge udoge nyoge, ngo agweeda yihru. Dhe yoohn nu, baru maalo keehde.

13 † Akuud yaa ayiih ge beed geen Baabihloanya ge akuud gen akwany Juoge wa akuud maru, wu amaahdh gene kedea Maarko waahda ke nying Jeacuu wu amaahdhe.

14 Maahdhu rogu naa aciel acielo ke cing apaar. Beehdu ke yoohm rogu wu yaa anweehd Juoge ke Jeacuu Kriihjto.

5:9 5:9 Epi 6:11-12; Jeam 4:7 5:10 5:10 1Th 2:12 * 5:12 5:12
Cihla: 1Th 1:1 † 5:13 5:13 Maarko: Pihl 24

Luwo

Luwo: Anweehd Me Nyaahn New Testament

copyright © 2003 Wycliffe Bible Translators, Inc.

Language: Luwo

Contributor: Wycliffe Bible Translators, Inc.

All rights reserved.

2025-05-10

PDF generated using Haiola and XeLaTeX on 10 May 2025 from source
files dated 10 May 2025

ba8353b1-57d5-55f2-870a-7ae8e7acbe62